



Tir Yimiyim

www.tirymiyim.in

Regd. No. RNI. NAGAAO/2004/13113. Postal-NE/RN-717.

e-mail : tirymiyim@gmail.com

TAPAK 8

Yangia anidakangma :



tir yimiyim

TAPAK 7

Asian Games: Indian equestrian team-i gold angu

Imran Khan ano anogo 14 sota ayutsü



VOL. XX NO. 346 (ADOK 346) DIMAPUR RASEMNÜ (WEDNESDAY) RONGJUI (SEPTEMBER) 27, 2023 ₹ 5.00

Nagaland nung Oct 1 nü merükmeju mapa meinyaktsü

Dimapur, September 26, 2023

(TYO): Prime Minister Narendra Modi-i October 1 Deobarnü linük ajungalen merükmejuba mapa inyaktsü ayongzükba magizüker ta Nagaland nung arogotemi anir loktitentet balalai metetdaksüogo.

Nagaland Baptist Church Council (NBCC)-i sangdong ka nung Deobarnü linük ajungalen merükmejuba maparen nung shilem magitsü metetdaksüogo.

Prime Minister Narendra Modi-i linük ajungalen merükmejutsü aser linük longjemtsü atema inyakba asoshi tenüsang agütsür ta NBCC-i ashi.

“Ajisüaka, October 1 ya Deobar anogo aser iba ya Khristantem asoshi tekülem anogo ka lir anungji Nagaland nung arogoi iba nung shilem magitsü. Iba mapa ya tajung saka NBCC kübok aliba arogotemi Honibar mesüra Hombur nung ang merükmeju mapa inyaktsü tuyur” ta parnokisa metetdaksü.

Ibala mapa inyaktsü sentong atongdang tamangba yimsü balala nungi tebilembatem angadangsüla ta NBCC-isa ashi.

Nagaland Joint Christian Forum (NJCF)-ia sangdong ka nung October 1 nü agitsü ayongba sentong September 30 nü agitsü metetdaksüogo.

Nagaland nung 5-Star Hotel 2 yanglutsü

Kohima / Dimapur, September 26, 2023 (TYO): Hotel Polo Towers Group-i Department of Tourism den tesentaktep yangluba ajanga Nagaland tourism sector jenjang temabai ajungkettsü.

Iba tenangzüktep ajanga Dimapur nung Mall ka den 5-Star Hotel ka aser Kohima nung ano 5-Star Hotel ka yanglutsü.

Iba mapatong ana nung takdang 200 tema alitsü aser Rs 150 crore endoka yanglutsü. Iba mapatong ya Public-Private Partnership (PPP) model kübok inyaktsü aser Design, Build, Maintain, Operate, Manage, and Transfer (DBMOMT) inyakyim nung aotsü.

Dimapur nung yanglutsüba 5-Star Hotel nung dining options, entertainment centers, aser retail outlets adentsü.

Kohima mapatong nung business aser leisure travelers atema luxury hotel ka yanglutsü. Iba mapatong ajanga Nagaland tourism ajungkettsü aser rongsenketzung renloktsü.

“Nagaland sorkar nung Tourism Department den külemi yariteptsüba ya

“Merükmejuba ya meimchir tongti teinyaktsü rongnung ka lir saka iba mapa ya onoki Deobarnü masü saka tanga anogo ka nung pelashishia inyaktsü. Deobar ya Khristantem tekülem anogo ka lir anungji iba anogo nung ozü züngsemtem mapa meinyakdaksütsü” ta NJCF-i Nagaland Chief Minister dangi züluba shidi nung shia lir.

NJCF-isa Nagaland CM dang bangdak department aser ketdangsürtem dang Nagaland nung Honibarnü Nation wide Cleanliness Drive agitsü osang sangdongtsü mepishia metetdaksüogo.

Maneni, Naga Students’ Federation (NSF)-ia arogo teloktem dang October 1 nationwide cleanliness drive mokdangtsü ayongzükogo.

Asenok tamangba yimsü inyakyimtem nungi masetshitsüla. India nung senso ajak indang tamangba yimsü akhümtsübuttsü aser yimjung nung alitsü atema bangzüng ka renemtsüla, ta NSF-isa metetdaksü.

“Naga lima aser India loktiliba nung tamangba yimsü ajak temetentem kümzüka ayutsü” ta NSF president Medovi Rhi aser general secretary Chumben Khuvung nati sangdong ka nung ashi.

maongka ka lir. Item maparen ajanga hospitality sector ajungketba dang masü saka mapa adoktsü aser rongsenketzung renloktsü. Onoki Northeast nung tongtipang yimti shia nung hotel ka yanglutsü alizüng den iba ya kanga puteta lir” ta Hotel Polo Towers Group nung CEO & Director Deval Tibrewalla-i ashi.

“Iba tenangzüktep ajanga Nagaland nung tourism sector tejakleni aoer. Hotel Polo Towers Group ajanga northeast nung hospitality tsütsü aika ajangshia arua lir anungji parnok den külemi inyaksemtsü yongyar” ta Tourism Department Director Keduosie M. Rio-ia ashi.

Hotel Polo Towers Group ya Northeast nung Hospitality Group tulutiba lir aser parnoki hospitality tsütsü mapa jenti inyakogoo. Tang parnoki hotel 9 lapoka lir aser ano 5 teyangludak lir.

Union MoS Teli-i Nagaland nung appointment letters 111 agütsü

Kohima, September 26, 2023

(TYO): Linük ajungalen Rozgar Mela agiba den külemi Nagaland nunga Dimapur nung nisung 111 nem appointment letters agütsüogo.

Union Minister of State for Petroleum and Natural Gas/Labour & Employment Rameshwar Teli-i tanü appointment letters lema agütsü aser ano nisung 86 dangi email ajanga appointment letters yokogo.

Prime Minister Narendra Modi lenisüba kübok Centre sorkari mapa adokdaksütsü tenangzükba agia inyaker, ta Union Minister Teli-i ashi.

“Sorkari organised sector nung lanurtem nem maongka agütsür aser ano kasa mapang unorganised sector nunga Social Security maparen balala ajanga lanurtem yarir” ta pai ashi.

Tang tashi nung unorganised

sector nungi nisung crore 29-i e-Shram portal nung tenüng zülüokogoo. Iba ya unorganised sector nung inyakterem asoshi national database lir ta Teli-isa metetdaksü.

“Sorkar rongsenketzung teinyaktsü rongnung mapa tasen adoktsüba ya lir. Tangar dang nungi teyari magiba linük ka akümtsü aser tetsürtem o sensakertem nem mapa agütsütsü atema sorkari Digital India, Smart City Mission, Atal Renewal and Urban Transformation Mission, Self-reliant India amala scheme aika tenzükogoo” ta paisa ashi.

Ministry of Labor and Employment ajanga mapa inyakterem social security atema mapa inyaker. Iba asoshi Employees’ State Insurance Corporation (ESIC), Ministry of Labour & Employment 2.0 tenzükogoo, ta Union Minister Teli-isa ashi.

Sorkar mapa nung tang aniokertemi Karmayogi Prarambh ajanga training agitsü akok. Iba ya iGOT Karmayogi portal nung online module ka lir aser e-learning courses 680 tema enoka lir, ta paisa metetdaksü.

Iba sentong nung NIT Director Nagaland Dr S Venugopal, Dimapur Deputy Commissioner Sachin Jaiswal, Chief Manager SBI Lunkhamong Singit aser AGM (Admin), FCI Mandeep Guray nungertem aden.

Mongulbarnü 9 buba Rozgar Mela nung linük kübok tesem balala nung nisung 51000 nem appointment letters agütsüogo. Rozgar Mela ya tesem 46 nung ayonga agi.

Central Government den State Governments/UTs sorkartemi iba mapa nung yariteper. Ministries aser Departments balala nung inyaktsü atema appointment letters agütsüogo.

Manipur nung kaketshir 2 tepsetba atema lungkak ait HOKOLBAR TASHI SCHOOL MELAPOKTSÜ; INTERNET SHIBANGER

Imphal, September 26, 2023

(Agencies): Manipur kübok Imphal Valley nung Mongulbarnü kaketshirtemi lungkak aitdang parnok 45 tashi yiru.

Taküm July ita kaketshir ana pur oa tepsetba atema kaketshirtemi lungkak aitdang police-i tenük amdaktsüba mokozü amshia tensa azioktsü merang.

Iba tatalokba sülen state sorkari Hokolbar tashi school ajak shibangtsü tetuyuba agütsüogo.

Hombarnü lanur ana indang noksatem social media nung prokshiba sülen Imphal nung aliba school aser college balala nungi kaketshirtemi lungkak ait aser tena tepsetertem aputsü atema takhangba agütsü.

Lungkak aitertemi Chief Minister sekretariat leni aotsü merang saka Imphal East district kübok Sanjenthong anasa police-i parnok noktang. Idangji lungkak aitertem azioktsü atema police-i tenük amdaktsüba mokozü aser batons amshia liasü.

“Lanur ana tepsetba anema school aser college kaketshirtemi Imphal nung rally ka agi. Parnok CM’s Sekretariat leni aodang

sepaitemi parnok senshidaktsütsü atema mapa inyak” ta police ketdangsür kati ashi.

Iba tatalokba nung kaketshir 45 tema yiru aser parnok mozü ki balala nung anioka anepaludar.

Tensa mejungi akümiba ajanga Manipur state sorkari Bodbar aser Hokolbar anogotem sodi asütsü metetdaksüogo. Tan Brihostibar ya Prophet Mohammad indang tasoba anogo Eid-e-Milad aser public holiday lir.

Hombarnü social media nung kaketshir ana indang noksatem adok aser iba sülen Manipur sorkari atasatsü aser ketdangsürtem nem bushisüngdang südaktsütsü ayongzükba liasü.

Lanur ana ya Phijam Hemjit (20) aser Hijam Linthoingambi (17).na ta jangaogoo.

Iba atema Imphal West district kübok Uripok, Old Lambulane, Singjamei nung kaketshirtemi lungkak aitba sentongtem agi. Ano, Thoubal, Kakching aser Bishnupur district tem nunga kaketshirtem aser sepaitem tsüngda mepetmesü adoka raratepba osangtem lir.

Hombur aonung tesü Chief

Minister N Biren Singh indang sekretariat ajanga iba ken o Central Bureau of Investigation (CBI) nem bushisüngdang südaktsütsü agütsüba osang metetdakja liasü.

“State police-i central security agencies den yaritepa kaketshir ana samaba aser tepsetba bushisüngdang südar. Sepaitemi iba mapa inyakterem aputsü atema bushiteptsü tenzükogoo” ta Chief Minister sekretariat sangdong nung ashi.

“Phijam Hemjit aser Hijam Linthoingambi na pur aoba aser tepsetba mapa nung shilem agir ajak merenshitsu” ta parnokisa metetdaksüogo.

Külen, Manipur sorkari taruba anogo pungu atema internet shibangtsü tetuyuba agütsüogo.

“State sorkari October 1, 2023 aonung 7:45 ako tashi Manipur state nung mobile internet data services, internet/data services through VPN shibangtsü lemtetogoo” ta sangdong ka nung metetdaksü.

Manipur nung May 3, 2023 nungi tenzükoo ita pungu jungnüa internet shibangba sülen Chief Minister N Biren Singh-i September 23 nü lapokja liasü.



September 25 aser 26, 2023 anogotem Vigyan Bhawan, New Delhi nung Arogya Manthan 2023 alidang Union Minister of Health & Family Welfare Dr. Mansukh Mandaviya-i Nagaland nem National Awards 3 agütsüdang agiba noksa angur. Iba sentong nung Nagaland nem “Prompt Anti-Fraud Action and Full Utilization of Allocated Fund for Hospital Claims”, “Ayushman Utkrshitata Award 2023 for Highest Ayushman Card Creation” aser “Best Claim Settlement Performance” sempettem agütsüogo.

10buba NEIMUN November 3 nü nungi tenzüka agitsü

Dimapur, Rongjui/September 26 (TYO): 10buba North East India International Model United Nations nung shilem agitsü atema North East nung aliba lanurtem jaokogo. North East India International Model United Nations-i sangdong ka ajanga ashiba agi, NEIMUN Secretariat 2023-i anogo asem agitsü aliba conference nung delegate tem host asütsü, koba November 3 nungi 5 tashi kohima nung agitsü.

NEIMUN 2023 ya NEIMUN Foundation-i ayongzükba youth leadership conference ka lir aser iba ya North East nung mezüngbuba Model UN conference ka lir. Iba conference ya alima nung UN4MUN (United Nations for Model United Nations) inyakyim sülen anidakba conference ishika rongnung ka lir, koba UN inyakyim ama

inyakasngshitsü atema United Nations-i asatetba ka lir. Lanur, Yimjung aser Security dak sendakba nung Security United Nations Security Council Resolution 2250 indang principle tem dak ajemdaker iba conference ya, temesepba mozü, prangbong injang shibelenba, sensaktia aser tzü mopung meleshiba ajanga timtem ajuruba tem densema NE tesem dak konshiba ken o tem sensaksemtsü nükjidong nung ayongzükogo.

Osang ajanga ashiba agi, iba conference nung North East nung aliba state tem ajak nungi lanur arishi küm 18 nungi 25 tsüingda alir 200 shi-i shilem agitsü. Parnok nem UNSCR 2250, lanur, Yimjung aser Security dak sendakba nung tangazükba agütsütsü aser linüsüba shilem agitsü asoshi tashi agütsüba den iba omen kübok onük aser ken o tem

sensaksemba nung shilem agidaksütsü. Lokti liba nung temelenshi asoshi NEIMUN-i parnok indang 'Speaker Series' bendenlokogo, kong nüngtugu nisungtem, panel discussions, interactive workshops, global village aser networking atema alitsü.

Iba dak sendakba nung NEIMUN-i, college aser university tem dang parnok kaketshirtem nominate asütsü aser NEIMUN kibong nung shilem ka akümtsü ayongzükogo. NEIMUN 2023 nung adentsü atema tejangrartemi NEIMUN's website www.neimun.org ajanga züngoksemtemtsü, mesüra teyari asoshi Secretariat züngsemtem den tongteprateptetsü. Tejangrartemi parnok den northeastindiamun@gmail.com ajanga tongteprateptetsü.

Mulungnen O



24th Nov 1948 – 20th Sept 2023

Onoki kanga dang meima aliba Late **Mrs. Imtisenla Imchen** (Mangmetong) Duncan, Dimapur, Kibongi, la shiranga aliba mapang nungi la teyanglur dangi shilangba mapang tashi, kija kibong, lokti aser Arogo balalai sarasadem, nübu, rongsen aser yimya balala agi tenlaa ozü koda masüba mapang yariogo, nenok ajak dang kangasa pelar. Onoki nenok dangi tsüngdong arua tepela aser ozü mulong achiba meshiteter, saka iba shity ajanga onok tepela lemsateper. Asen Kibuba Tsüngremi nenok ajak tali moajangma, aji ozü sarasadem.

- Temeim Kinungbo, Jala, Anükapangtem aser Semchirtem.

State Review Meeting & Training of National Oral Health Programme tenzükogo

Dimapur, Rongjui/September 26 (TYO): National Oral Health Programme Nagaland, Directorate of Health & Family Welfare-i, September 26 aser 27 ta anogo ana agitsü atema State Review Meeting & Training of National Oral Health Programme ayongzükba agidar. Iba sentong ya IDSP Hall, Directorate of Health & Family Welfare, Kohima nung agidaki.

September 26 nü sentong ya Addl. Director Dental & SPO (NOHP), Dr. Meribeni Odyuo lenisüba nung agia liasü. Sentong nung o jembiba mapang lai shilem agirtem ajak pelashishia agizükba den shilem agiba atema pelaba lemsatepa liasü aser ashiba agi, Dental Surgeons tem atema State

Review Meeting ya kanga tongtibang lir kechiyong NOHP Program kübok tang mezüngbuba iba amala senden ka ayongzükogo.

Laisa, anogo ana training agiba mapang Dental Health unit 34 prongla nem shilem agitsü aser parnok tajangshibatem lemsatepsü asoshi maangka agütsütsü ta ashi. Dr. Odyuo-isa, state nung tanga Health Program tem den longjemer koda inyaksü iba dak sendakba nung tajangzük ka-a sensak asemtsü atema shilem tajung agitsü mepeshia liasü.

Sentong nung alakteta jaoker Director (Dental), Dr. Chiekroshuyi Tetseo-i, Jr. Dental Surgeon, CHC Viswema Dr. Savi Naleo aser Sr. Dental Surgeon, NHAK Kohima Dr.

Pfukrolo Koza na nem "Principal Director's Commendation Certificate" agüja liasü.

Kasa mapang nung CHC Changtongya nem "Best Dental Health Unit" indang kuli kaket agüja liasü.

Dr. Tetseo-i, mozükitem nung dental care services & procedures kanga junga ajungketer asünung pai lokti nem service tali tajungba agütsütsü imlaba lemsatep.

Oral health ya aikati sentoka toktür ta shia pai, ajak dang dental procedure tem ya cosmetic dang masü saka anema alitsü asoshi kanga tongtibang ta angaziidaksütsü ajungshia liasü. Paisa, sentong nung shilem agirtem dang lokti ajangzükdaksütsü atema maneni longjemer inyaksü ajungshia liasü.

Minority Affairs-i logo tetoktepba osang sangdongogogo

Dimapur, Rongjui/September 26 (TYO): Directorate of Minority Affairs-i sangdong ka ajanga Directorate of Minority Affairs dak sendakba nung Logo ka shimtsü asoshi tetoktepba agiba

osang sangdongogogo. Screening Committee tetuyuba dak ajemdaker Directorate-i iba tetoktepba ya Institute of Design and Media, Midland Dimapur nungi Neikolhi Tsido-i akokba sangdongogogo.

NBSE-i HSLC & HSSLC tatidang indang metetdaksü

Dimapur, Rongjui/September 26 (TYO): Nagaland Board of School Education (NBSE)-i September 26 nü sangdong ka ajanga, regular kaketshirtem atema High School Leaving Certificate (HSLC) aser Higher Secondary School Leaving Certificate (HSSLC) Examinations, 2024 asoshi registration dak sendakba nung tongtibang osangtem metetdaksüogogo.

Osang ajanga ashiba agi, regular kaketshirtem atema parnok tenüng züngoksemtsü asoshi October 3 nungi 13 tashi lapoktsütsü.

Tatidang agütsütsü aliba

regular kaketshirtemi NBSE portal nung nbsenl.edu.in ajanga application form fill up asütsü nüngdaker. Institution aser school tem dang tenüngdakba taa bendentsü, application form tem verify asütsü aser atakzükja aliba mapa tsüingda regular candidate tem indang tatidang taa yoktsü asoshi nongloktüsüogogo.

Kasa sangdong ajangsa, atakzükja aliba anogo süitemba sülen applications kecha magizüktsü, anungji candidate tem dang atakzükja aliba mapang tsüingda maparen ajak tembanga inyaksü metetdaksüogogo.

District Handloom Expo, "TanaBana," lapokogogo



Industries & Commerce, Joint Director, N. Vikheho Aye-i September 26 nü Kushiabill Public Ground, Dimapur nung District Handloom Expo, "TanaBana," lapoktsüdang tangokba noksa angur.

Dimapur, Rongjui/September 26 (TYO): Joint Director of Industries & Commerce N. Vikheho Aye-i September 26 nü Kushiabill Public Ground, Dimapur nung District Handloom Expo, "TanaBana," lapoktsüogogo.

September 26 nungi 30 tashi anogo pongu lapoktsü aliba Handloom Expo ya Development Commissioner Handlooms, Ministry of Textiles, Government of India-i senotsü teyari agüja Department of Industries &

Commerce-i ayongzükogogo aser iba den Udyog Bhawan, New Delhi-i teyari agütsüdar.

Expo lapoktsüba sülen Joint Director N. Vikheho Aye-i exhibition stall tem ajak sema senzü aser local sütakertemi atakba sütem agi kanga temulung asüba lemsatepogogo.

Expo lapokba sentong nung Industries & Commerce, Functional Manager Lucy Ngouri-i iba expo indang tatsü agi metetdaksü. Lai ashiba agi expo nung stall 25 lapoka lir,

kong handloom products sayadak stall 20 aser handicraft indang stall pongu lir.

Laisa, iba expo lapokba nükjidongji sütakertem nem parnoki atakba sütem sayatsü asoshi sabang ka agütsütsü aser parnok indang osettem indang indanga ayoktsü atema maangka agütsütsü asoshi lir, ta ashi.

Maneni lai nüburtem dang expo semdanga local sütakertemi atakba sü alia parnok nongita yaritsü asoshi ayongzükba liasü.

NSCPCR-i tanur dak mebenshitsü yimya benshiba aitsü

Dimapur, Rongjui/September 26 (TYO): September 19 nü benokba FIR dak ajemdaker Tuensang nung Holy Angel School den sendaktepa alisang Jose V.J-i tanur dak mebenshitsü yimya benshiba (molestation) Nagaland State Commission for Protection of Child Rights-i

sangdong ka ajanga aitsüogogo. Commission-isa, POCSO Act dak ajemdaker aija alisang merenshitsü asoshi parnoki takokba tashi jenjang agitsü metetdaksüogogo.

Kasa mapang nung Commission-i, tanurtem takaratiba nung kümzükba atema kanga pelaba lemsatepa liasü.

NBSE-i Sign Languages Quiz indang metetdaksü

Dimapur, Rongjui/September 26 (TYO): Ministry of Education aser My Gov na longjemer International Day of Sign Languages Quiz sentong ka ayongzükba Nagaland Board of School Education-i sangdong ka ajanga metetdaksüogogo. Iba quiz ya September 23 nü 10:00 ako nungi tenzüka December 2 11:30 ako tashi agitsü.

Iba sentong ya tenarong tajakertem aser sign language amshirtem linguistic identity aser cultural diversity indang tangazükba agütsütsü aser ISL indang specific features aser India nung Deaf culture indang tangazükba agütsütsü nükjidong nung ayongzükogogo.

Quiz nung shilem agir ajak nem e-Certificate agütsütsü.

Terms aser Condition dak sendakba nung quiz indang linük ya <https://quiz.mygov.in/quiz/international-day-of-sign-languages-quiz/> nung angutsü.

Anungji, institution tekolaktem dang Sign Language ya tenarong tajakertem atema dang masü saka ajak atema lir ta kaketshirtem nem angazükdaksütsü asoshi mepeshia metetdaksüogogo.

Maneni parnok dang tetoktepba nung kaketshirtem jangrabangra shilem agidaksütsü atema parnok ajungshitsü aser osang tejangja agütsütsü mepeshia metetdaksüogogo.



September 26, 2023 nü New Delhi nung 13buba Indo-Pacific Armies Chiefs' Conference (IPACC) nung Union Defence Minister Rajnath Singh, Chief of Defence Staff General Anil Chauhan, Chief of Army Staff General Manoj Pande aser Chief of Staff of the US Army General Randy George nungeri kaket ka sayadang tangokba noksa nung angur.

FCRA kübok NGOs-i Foreign funding kübok kiojen sangdongtsüla

New Delhi, September 26

(Agencies): Ministry of Home Affairs (MHA)-i Foreign Contribution Regulation Act (FCRA) kübok register süa aliba Non-Governmental Organizations (NGOs) ajaki küm shia senotsü anguba osang sangdongba dak sendakba ozüing yanglushiogo.

Joko tang nungibo FCRA kübok register süa aliba NGOs-i bendanglen nungi anguba senotsü ajanga aliba kiojen osang ajak sangdongtsüsa aküimtsü.

Foreign Contribution Regulation Rules, 2010 nung arrla ana bendenlokogo, (ba) bendanglen nungi anguba senotsü agi alizükba belenshitetba osettsüset osang (financial year March 31 tashi nung), aser (bb) bendanglen nungi anguba senotsü agi

alizükba kiojen osang (financial year March 31 tashi nung), Ministry of Home Affairs-i sangdong ka ajanga, "Foreign Contribution (Regulation) Act, 2010 (42 of 2010), kübok Arrla 48 nung agüja aliba tashi amshia Central sorkari Foreign Contribution (Regulation) Rules, 2011 maneni yanglushir: 1. Title & commencement. - (I) Item ozüing dang Foreign Contribution (Regulation) Amendment Rules, 2023 ajatsü.

(2) Official sangdong agütsüba anogo nungi mapa küma inyaktüsü. 2. Foreign Contribution (Regulation) Rules, 2011 kübok Form FC-4 nung serial number 3 nung clause (b) sülen iba ya bendenloksü :- (ba) bendanglen nungi anguba senotsü agi

alizükba belenshitetba osettsüset osang (financial year March 31 tashi nung), aser (bb) bendanglen nungi anguba senotsü agi alizükba kiojen osang (financial year March 31 tashi nung) sangdongtsü," ta metetdaksü.

MHA-i Foreign Contribution (Regulation) Rules yanglushiba sülen tang nungibo FCRA kübok melungtet teloktemi (NGOs) bendanglen nungi anguba senotsü agi alizükba osettsüset aser kiojen osang tejangja meetdaksütsü.

Taküm July 17 tashi nung linük nung FCRA license alir NGO 16,301 lir. Tesüiba küm pongu tsünga linük nung NGOs 6,600 indang FCRA license agientsüogo. Tanü tashi nung linük nung NGOs 20,693 indang FCRA license agientsüogo.

September 20 nüa CM-i main sekretariat semdanga liasü. Iba building nung tongtibang departments-Cabinet Sekretariat, Home, General Administration, Finance, Planning and Development aser chief secretary, development commissioner aser additional chief secretaries office tem lir.

Iba mapang nungji pai, "Ni hopta shia anogo asemnü main sekretariat nung kü office semdangtsü aser hopta shia anogo ananü CM sekretariat nung office semdanga ketdangsertem mita reprangtsü," ta metetdaksü.

Bihar CM Kumar-i minister tem office mita aodang aika maliasü

Patna, September 26

(Agencies): Mongolbarnü Bihar Chief Minister, Nitish Kumar-i ajungbena minister tem office mita aoba mapang nung minister tem teimbaka office nung maliasü.

Minister aika pei office nung maliba agi chief minister kanga jashia liasü.

Iba sülen pai minister tem aser ketdangser ajak dang anepdang 9:30 ako tashi nungbo office nung alitsüla, ta tuyuogo.

Kumar-i Vikas Bhavan (New Sekretariat) aser Visvesvaraya Bhawan (technical sekretariat) na semdang. Vikas Bhavan semdangba mapang minister aika office nung maliasü.

Office nung maliba minister temji Chandra Shekhar (Education), Alok Kumar

Mehta (Sugarcane Industries minister), Samir Kumar Mahaseth (Industries), Sheela Kumari (Transport) aser Kumar Sarvjeet (Agriculture) nunger liasü.

Iba sülen Chief Minister-i Visvesvaraya Bhawan semdang; iba building nung department trok- state planning board, rural works department, road construction department, minor water resources department indang office tem lir.

Osangbenertem den jembidang Kumar-i, "Ni ketdangser ajak anepdang 9:30 ako tashi nungbo office tonga odaktsüner. Ni semdangba mapang office nung malirtem dangi idangyongjisa call süa office-i maoba kuli asüngdangogo," ta metetdaksü. CM-i, "2008 küm nungi 2013

küm tashi ni anogo shia 9:30 ako nungbosa office atong. Tang nungi ni mapang shia sorkar office tem semdangtsü lemtetogo," ta metetdaksü.

September 20 nüa CM-i main sekretariat semdanga liasü. Iba building nung tongtibang departments-Cabinet Sekretariat, Home, General Administration, Finance, Planning and Development aser chief secretary, development commissioner aser additional chief secretaries office tem lir.

Iba mapang nungji pai, "Ni hopta shia anogo asemnü main sekretariat nung kü office semdangtsü aser hopta shia anogo ananü CM sekretariat nung office semdanga ketdangsertem mita reprangtsü," ta metetdaksü.



September 26, 2023 nü New York nung India External Affairs Minister S Jaishankar-i UNDP Administrator, Achim Steiner ajurua senden amendang tangokba noksa nung angur.

TMC-i MGNREGA sen meshia Centre dangi shidi lakh 50 yoktsü

New Delhi, September 26

(Agencies): Taruba ita Trinamool Congress (TMC)-i New Delhi nung longkak aita Centre sorkari West Bengal nem tagütsütsü aliba MGNREGA sen khanga longkak aittsü lia maneni TMC-i iba sentsüh meshia Panchayati Raj Union Minister, Giriraj Singh dangi shidi lakh 50 dak tema yoktsü.

TMC-i, BJP-i aniba NDA sorkari West Bengal nem Mahatma Gandhi National Rural Employment Guarantee Act (MGNREGA) scheme kübok mapa inyakba aser Gramin Awas Yojana scheme indang sen crore 15,000 tagütsütsü lir, ta metetdaksüogo.

TMC national general secretary, Abhishek Banerjee-i X ajanga, "Centre sorkari tim mesüi benshiba anema West Bengal nüburtem

longjema dang lir aser onok tangutsü aliba tim meshitsü. Democracy nungo nüburtem tashi tuluba," ta metetdaksü.

TMC lenir kati, "Onok den nüburtem lir, MGNREGA kübok mapa inyaktertem aika sen mangu anungji onoki item shidi zülur. Tang tashi nung onoki shidi lakh 50 dak tema bendenogo. Parnok ajaki iba scheme kübok tagütsütsü aliba sen agüjang ta akhanger. Onoki item shidiji Ato kilonser Narendra Modi aser Minister Giriraj Singh na indang office dangi yoktsü," ta metetdaksü.

Iba dak alia TMC nungi telok kati October 3 nü New Delhi nung Union Panchayati Raj Minister Giriraj Singh ajurua MGNREGA sen tagütsütsü aliba atema jembitsü, ta September 23 nü Bengal minister, Chandrima Bhattacharya-i metetdakja

Canada nung Khalistan pusemer-temi India anema longkak ait



September 26, 2023 nü Ottawa, Ontario nung aliba Indian High Commission kima Khalistani pusemertemi longkak aitba noksa nung angur.

New Delhi, Rongjui/

September 26 (Agencies): Canada nung Khalistan pusemertemi yimti kar nung Indian diplomatic missions kima longkak aitogo.

Tawa Canada Ato kilonser Justin Trudeau-i, British Columbia nung Khalistani lenir Hardeep Singh Nijjar tepsetba nung India-i shilem agia alitsüa akok, ta sangdongba sülen India o Canada na tsüngda tesendaktep mejungi kümogo.

Toronto nung nisung 100 shi adenshia Hardeep Singh Nijjar tepsetba atema India sorkar anema longkak aيتدang parnoki India nunger wako ka rongdoktsü aser Ato kilonser, Narendra Modi den tsüngsem noksa ka saya.

Vancouver consulate nunga Khalistan pusemer nisung 200 shi adenshia longkak ait.

Ottawa nunga nisung 100 jungnüa Indian High Commissioner office kima adenshir Punjab region nüchiso atema takhangba agüja longkak ait.

Ottawa nung longkak

aitertem rongnung ka- Reshma Sing Bolinas-i Canada Ato kilonser Justin Trudeau dang pelaba lemsatep aser Canada dang Nijjar tepsetba dak sendakba ochi jungkai adoktsütsü atema maneni bushisüngdangtsü mepishiba den külemi India dang tarutsü nungbo tai maket nisungtem mepetsettsü atema metetdaksütsüla, ta ashi.

Toronto aser Ottawa nung longkak aittertem rongnung karibo Indian High Commissioner to Canada, Sanjay Kumar Verma jendoktsüla, ta takhangba agütsü.

Tamalen Sanjay Kumar-i, Khalistani pusemertemi longkak aيتbaji ketdangsertemi meteta dang lir, aser ketdangsertemi parnok nem security agütsür, ta aija liasü.

Nijjar-i Punjab toktsür Canada-i aoba sülen Canada senso aküm. 2020 küm India-i Nijjar ya kiralongrar ka, ta sangdonga liasü.

Taküm June ita nung nisung anati Gurdwara ka kima Nijjar khaseta liasü.



TIR YIMYIM YIMOBILEM (EDITORIAL)

DIMAPUR RASEMNÜ, RONGJUI (SEPTEMBER) 27, 2023

Nütsüng Züngdangtsü Atapisür

- Tangsen Lemtur

1 881 küm nungi tenzuka India nung küm 10 shia nütsüng yongsük sükdanga aruogo, ajisüaka 2021 küm nungbo coronavirus wara aliba agi nütsüng yongsük züngdangba maparen (census) atsülanga liasü. Ajisüaka United Nations data apibo, taküm March 20 tashi nung India nung nütsüng 1,416,148,323 (1.4 billion) liasü. Linük nung terenlok mapatem aser asalentong balala yanglutsü atema mapang shia nütsüng yongsük züngdanga jangjatsüji kanga tongtimbang, ajisüaka wara aliba agi 2021 küm census magitet aser tanü nütsüng züngdangtsü atapisür. Warabo süiadokogo saka joko küm ana- asem renteta tang tashi census magiba ya kechi kuli ajanga? ta aikati shisadanger. India nung dang masü saka tanga linük kar nunga wara ajanga census atsülanga liasü saka parnokbo census maparen tenzükadokogo. India nungbo 2021 küm agitsü aliba census 2024 küm tashi atsülange. Tawa Registrar General of India (RGI) office nungi shidi ajanga states aser union territories ajak dang January 1, 2024 tashi iba maparen atsünglangba metetdaksüogo. 2021 küm census agitsü liasü saka coronavirus wara anema tenokdangba aliba agi magitet. Wara süiba sülen tenokdangba ajak agienadokogo aser mapang mashie ka nung census agitet, saka Centre nung BJP sorkari maneni census atsülange. September 20 nü Lok Sabha senden nung Union Home Minister Amit Shah-i, general election agiba sülen ang Women's reservation bill mapa kuma inyaksü atema census agitsü, ta metetdaksüogo. Anungji census agitsü küm asem agi menor asütsü. Taruba census agiba mapatong yabo tesüiba mapang dang nungi khenyongi balaka asütsü, kechiyong taruba census ji 'digital census' asütsü ta sorkari metetdaksüogo. Sorkar ketdangsertem aser school tesayur lakh 30 dak temai iba maparen inyaksü. Tesüiba mapangtem nungbo census agitsü atema ita 11 tashi agi liasü saka tangbo technology teyari ajanga mapang tatsüba agitsü. October 1 nungi Registration of Births and Deaths (Amendment) Act, 2023 mapa kuma inyaksü aser ibaji ajanga population register, Aadhaar, ration card, passport aser driving licence database nung yarisema census agiba maparen temelaba akümtsü. Item data ajanga electoral roll-a merüktettsü; arrshi küm 18 ajungdang electoral roll nung züngoktsü aser asürtem tenüng electoral roll nungi agienba ajanga electoral roll bentettsü. India ama linük tuluka nung nütsüng yongsük züngdangba maparen ya atamata mapa ka masü. Ajisüaka census agiba ajangadang linük nung nütsüng kwi aliar jangjaba den külemi rongsenketzüng jenjang, tetsür-tebur kwi ali, kanga sensak tia nung alirtem kwi, middle-class pur kwi, takar kwi, matamabensartem kwi, kibong kümer alir kwi; item osangji tejangja metettsü. Item osangji ajanga sorkari nüburttem taküm jenjang ajungkettsütsü atema asalentong balala yanglua inyaksü. Census agia nütsüng jangjaba ajanga nüburttem jenjang junga angatetter, ibayongji sorkari census nung sen crore aika indok mesasar. Ajisüaka küm asem tashi census atsülangba ya ajanga nütsüng nüburttem aika takoksa angur. India nung dang masü saka bendanglen-a research agirtemi linük rongsenketzüng aser loktiliba jenjang asadangtsü atema nütsüng yongsük osang tejangja nungdaker. Rongsenketzüng tsütsü mongintem, loktiliba meteter mongintem aser shisashirtemi linük atema asalentong tajung benoktsü asoshi census data nungdaker, saka 2011 küm census agiba sülen joko küm 13 buba census magiba agi tetsükdaktsü ajurur.

OLEMSABANG

TANISHIR TAJUNG KA

-M.Meren EX. Pastor

Alima nung tanishir tajung ka angutsübaji kanga tang tasak aser tanishir tamajungi raksaba yanglushitsüjisa tasaktiba aser aiben meyanglushiteter aser ibaji ajanga kin ka telongi alubaji iba nungjagi tenzük.

Tsüngremi shimtetba Israel kin 12 loksaa aobaji Solomoner japaso Rehoboam kanga majungba ajanga atalok, kechiaser pai tambur shisa magi saka par pur asangurtem shisa agi aser tebu dang nungi tetokzemba agi yimsü asütsü tenzük, iba amaji tebilemdang makaba shisa tatsü ajanga par yimli nung teraksa tulu adok aser pai yimsü asütsü asoshiibo kin ana tang anunga yutsür Jeroboami kin 10 lokzuka bener ao, Israel kin loksaba tetenzükibaji ibaji liasü.

Akidang 16 century mapang London yimti mi agi 7 ben tashi metsürepa rongtok, iba mi jagi London senti rongsen ajak mitsü kema rongtok, aser nisung jenti rongset, aser iba sülenji wara tulu aru aser nisung mezüngtangtet asü. Iba atakatemji England Parliment nung ashikelak aser tiyazü tsüngteter chuba den atongba tasa tamajung ajanga chuba aini or alidang chuba pua tepsettsü sen agi Parliment membortem mesüker par chuba tepsettsü tebu-metsükshia ata aser chuba ain nungi teshilanger pua tayur ta konung tepuokdak ayu aser tananü chubai pa asütsü langa mapa tamajung inyaktetaogo ta ser nüpurtem ajak sentendaktsür yimjak nung chubaji tekolak atang. Tai maket chuba tepsetba Tsüngremi kanga kokoa jashi aser par England limai atakatem yoka küm 7 tashi kokoa merenshiba angur. Aji nüpur majungba ajanga atalok masü saka lenir ochi mashi ashikelak ajanga nüpurtem nem bener arutsüba atakatem liasü. Anungji nüpurtemi timtem marem parlinmen member ajak arishia tepseta aoba angutsü.

Ken mapang ka nung Germany yimti jirepa laoba aser mezüngdangtet nütsüngnüpür samadaktsüba meteter südi, iba takoksaji tanga kecha masü saka Tanirshir tulu Hitler ajanga atalokba angutsü, pa mesotet asübo tanü Germany yimti alima kini süngmangtsüsa yangerteter kala ta bilemer.

Israel nung Yihuda kin yimtiba Jerusalem nung Solomoni yangluba nungshi tenla ki koba alima ajak nung teshushitsüka(kin ajaki jembitsüsa) akatsüba aser Yirusalem longtsüki China wall tang nungi nungtugutiba akatsüba saka AD 70 nung Babilon nung arur ajakji awoi kema tepsatsür mezüngdangtet nüpurtem tepset, oda yirusakem yimti ajunga tasü mang agi asüng saka aika jenzüka otet, aser jena aortemji kar England nung, kar France nung aser kar Germany nung ta perokshia jenok. Saka yihuda nung shir alima kintem rong nung jenoka lia ao aser nütsüng jenti pi bendang lima nung renlok saka kin ajak jagi tesüngmangtsü rishikangshia aser tepseta arishi aser parnok rongsen ajak rakzuka ayu. Oda küm jenti bendang lima alar tia nung liyonga aodang German lima nungbo ano kenüyongi Yihuda nungjerji aiür-asangur, tanur tila aser tulu, tantsü-tambur Lakh 6 dak tali Hitleri tepsetba angutsü. Yamaji Yihuda nung atakatem anguba taiji kodang Yihuda nung Farici aser Saduki temi Tsüngrem chir Yisu Khrista ashikelak agi pua kangki nung tepset iba anogo nungto pa tepsetba ashikelak mapaji onok tai masü saka pa tai alang tepset ta aitsü saka ibaji tai sürabang taiji onok aser onok chirnur aser semchirtem dak kaodakjang ta ain adoka ayimtenba atakatemji atalokba angutsü.

Alima nung Yihuda aiatai tiaji tangar shinga tai masü saka lenir atakatem ochimashi aser ashikelak mapa ajanga tanü tashi parnok kolak aka matutetba angur, saka aji nüpur tai masü saka lenir ajanga atalokba angutsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

NBCC-i Sanitation Drive tanga anogo ka nung ang amongtsü: NBCC



Kohima, September 26 (TYO): Ato kilonser, Narendra Modi-i linük tesem ajaklen merüka amongtsü ayongzükbaji Nagaland Baptist Church Council (NBCC)-i pelaa agizüker, ajisüaka October 1 anogo ya Khristantem atema tekülem agiba anogo lir, anungji Nagaland nung Arogoibo iba tayongzükbaji magizüksüsa akümtsü, ta NBCC General Secretary, Rev. Dr. Zelhou Keyho-i sangdong ka nung metetdaksü.

Khristantem atemabo Amongnü ya sodi anogo ka dang masü saka Tsüngrem

külemba anogo lir, ta pai metetdaksü.

Iba dak sendakba nung NBCC kübok Arogotem dang iba anogomongji Honibar mesüra Hombar ang amongtsü metetdaksü.

"NBCC-i mapatong tajung balala atema sentong renem dang yimsü balala-a asadangtsü mepishir. Ibaji ajanga tsükchitep, tesempa, tetsübu aser amokmeren malitsü aser linük tulu ya longjemdaksütsü," ta sangdong nung shia lir.

"India ama linük ka nung ibaji kanga tongtibang, kechiyong


asenok ya sobaliba balala aika temeyoktep aliba linük ka dang masü saka tamangba yimsü balala aliba linük lir. Asenok temeshi anogotem, tekülem anogotem aser benjung anogotemji balala. Anungji kati ka akhümtsübuttsü aser züngshitsüji tongtibang. Sobaliba aser yimsü aika aliba linük nung inyaksangshitsü atema shisatsü nüngdaker," ta kasa sangdong nung shia lir.

"Arogoi merükmejua amongba anogo mesüra linük longjemtsü atema inyakba mapatong anema menokdaker. Oda iba ya October 1, onok tekülem anogo asüba agi lir! Iba mapatong ya asen teinyaktsü mapa lir ta onoki angateta lir aser onoki amaliteptsü. Ajisüaka iba anogoji onok tekülem anogo asüba ajanga Nagaland nung Khristantemi October 1 nü (Amongnü) Tenla kidangi ang aotsü aser linük nungita aser amalitep sayua tanga anogo ka nung ang amongtsü," ta NBCC-isa metetdaksü.

Jeff Kinley-i Jungkai Adok kaket nung ajemdaker kaket ka saya



Jeff Kinley



September 26, 2023: Khristan kaketzülur nungtugu kati Laishiba nung Jungkai Adok kaket nung shia aliba ama tatembang anogo aser Yisu Khrista alimai tanaben arutsü jakdang alima nung tatalokbatem indang kaket ka sayaogo.

Laishiba nung shin otem dak sendakba nung mongin, Jeff Kinley-i "God's Grand Finale: Wrath, Grace, and Glory in Earth's Last Days," kaket saya aser Khristantem dang Jungkai Adok nung shia alibatem aser tatembang anogotem indang Tsüngrem sentong shisadangtsü mepishi.

Jeff Kinley-i, Jungkai Adok kaket ya khenyongi balaka aser kanga tongtibang, kechiyong iba kaket ya Laishiba nung tatembangbuba kaket lir aser Tsüngremi Pa Arogo den tatembangbuba jembiba kaket lir, ta ashi.

Interview ka nung jembidang Kinley-i, "Iba kaket nung tatembang anogo,

timtemba mapang, kodak, Khrista tanaben aruba aser Antichrist indang densema aika shia lir. Ajisüaka Khristantem teimbakati Tsüngremji asenok atema shibaar Jungkai Adok nung shia aliba memeteter," ta ashi.

Kinley-i, "Jungkai Adok ya shingai mangatetsü, ta asüba ya tangatetba tai. Nai shisadangra 'revelation' tetezü 'jungkai adoksüba' lir, anungji Tsüngremi kaket ka zülua iba dangji Yisu Khrista indang jungkai adokba, ta nungja agüja aser shingai mangatetsüsa zülü, ta asüba nungji tetezü mali," ta metetdaksü.

"Nai tongmelang agi dang azüngyonga angatetsü, ta ni bilemer," ta paisa ashi.

'The End Times' kaket zülusang Kinley-isa Tejen Lai nung aliba shin otem aser Tasen Lai nung aliba shin otem mesüktepba indang jembiba den külemi Khristantemi Tasen Lai nung tatembang anogo indang

Lai tekongtem koma azüngtsüar lemsatep.

"Kodang nai Tejen Lai nung Khrista alimai arutsü atema shin otem züngdangra, item ajakji atangji atalokogo, aser itemji Tejen Lai nung zülua aliba amai lir," ta pai ashi.

"Ano Tasen Lai nung Yisu tanaben arutsü aser tatembang anogotem indang shin otemji reprangdangra Tsüngremi shin o nung shia aliba ama item ajakji atalokdaksütsü ta asenoki amanger," ta paisa metetdaksü.

Kinley-i, Jungkai Adok nung shia alibatemji ano matalok, ta ashi.

"Iba kaket tasenba ajanga Tsüngrem den tesendaktep ayutsü aser alima nung Kibuba yimli yangertsü atema nüburtem nem teimla agütsütsü ta amanger," ta pai ashi.

"Anüng aser alima ajak kiburji Tsüngrem lir. Jungkai Adok nung Yohan-i anguba ajakji Tsüngrem ajanga lir," ta paisa shisem.

ANOGO ABEN TSÜNGREM DEN

Taitsüba Aser Angatetdaksüba

"Tsüngremi mulungba amato jashitaksübai, tanaben mesasatsüsa, tekümtet asoshi temulung meyipdaksür" (2. Kor.7:10)

Taitsüba aser kongshia aitba tatishitsü tajungtibaji Iskariot Yihuda aser Simon Peter lir. Aji saka Yihuda satani ashioktsü. Pai Yisu ashioktsü (Lk. 22:3-5). Kodang Yihudai pai inyakba bilemtet, pai kanga jashi aser pa sasa soseta asü. Pa soseta asübaji satani aitsüba asü Tsüngremi kongshiba ? Ibai taitsüba , kechiaser pai pa sasa tepset. Taitsüba jagi tasüba dangi anir; kongshia jashitaksüba jagi temulung meyipba aser taküm dangi anir.

Peteria Yisu menangzük. Nütsüngtem rongnung jembiba ama, ibai asüküm nungi tenzüker; shiba tuluba asütsü. (Lk. 22:24-30). Asüküm ajanga Peteri satan nem' tetsüng ajemmetdak ka agütsü (t.31). Saka Yisui Peter asoshi sarasademtsü (t.32)

Peteri Yisu den asütsü nangzük. Saka Yisui pai pa ashioktsütsü ta ashi, aser aji atalok (Lk. 22:33,34). Peteri angateta aru aser jashi aser temulung meyip (Yn. 21:1517). Kodang tejashi nung Tsüngrem nungi piladir satani na aitsür. Ibaji nokdangang. Saka kodang ne tejashi jagi Khrista den ajurutepdaksür aser ne tai nangzüker aji Tanela ajanga inyakba. Khristai asenok tatidang ajak nung yarir (1 Yn. 2:1). Kibuba, Tebu matsüngdang onok aitsüba ajak nung nai kümzükba asoshi pelar.

Syria aser Lebanon nung Khristantem samatsüsa tensa ka nung lir

September 26, 2023: Tang nung Khristantemi pei linük Syria aser Lebanon linük na dak melung malemer aser nung Khristantem aikati pei tarutsü atema teimla mangur," ta ashi.

Linük toktsür aoba ajanga tarutsü nung linük ana nung Khristantem samatsüsa tensa ka nung lir, ta Arogo lenir kati metetdaksü.

Aid to the Church in Need (ACN) indang '2023 Religious Freedom in the World' report ajanga ashiba agi, 2016 küm Syria nung nütsüng shilem 6.31 Khristantem liasü ajisüaka 2021 küm tashi nungbo Khristan nütsüng shilem 3.84 dang kümogo.

CIA Factbook ajanga ashiba agi, tang Lebanon nung nütsüng shilem 32.4 shi Khristantem lir. 2010 küm nungbo Lebanon nung Khristan nütsüng shilem 40 dak tema liasü (US State Department report).

ACN den jembidang Melkite Greek Catholic Patriarch, Youssef Absi-i, Middle East nung Arogotemi Khristantem dang pei linük toktsür maotsü ajungshir, ajisüaka Khristantem aikati Middle East toktsür aoter, ta metetdaksü.

Paisa, "Joko Middle East

Coronavirus wara ajanga Syria aser Lebanon naprongla mejungi kongshi aser tang rongsenkettzüng dak sendakba timtem lir. Iba dak alia Syria nungbo civil war lir.

Absi-i, "Khristantem nem teimla agütsütsü kanga tasak kümogo, kechiyong tensa tajungba makümer. Khristan aikati pei linük toktsür aoter. Rongsenkettzüng, sobaliba aser yimtenren dak sendakba kuli balala ajanga aikati linük toktsür aoter," ta metetdaksü.

"Tamangertem yaritsü atema onoki akokba tashi inyakdar. Onoki parnok nem nüngdak balala agütsüdar, ajisüaka onoki sorkartembo melentsü makok," ta pai ashi.

"Teyari mengura onoki Khristantem dang linük toktsür maotsü atema majungshitetsü," ta pai ashi.

Paisa anüolen aliba linüktem dang Syria anema tenokdangba balala agientsüla, kechiyong ibaji ajanga nübur ajak mejungi kongshir, ta ashi.

AO OSHI ANGAZÜKDAK:
TANÜ ANGAZÜKTSÜBA OJANG



Samesa

(adj) tagitsü mait nisung (useless person)
* Pa samesa asüba agi teloki pa nübo mamshir.

San

(n) ajemalu shiruru, tereprangtsü nabong mesüker
* Israel lima nungbo san aika lir .

OLONG PAITEP # 6649

	1			2		3	4
5						6	
7		8					
					9		
	10						
11							12
				13			
				14			
15							

TIPIEN

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenü'er jabaso - (4)
- 10. Sen latetsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

LANGTSÜNGLEN

- 2. Hai sür inyak - (4)
- 3. Aor tenüng ka - (6)
- 4. Ali telungi talangka lur - (5)
- 5. Tebang kenyongi mazüoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

OLONG PAITEP # 6648 TELANGZÜBA

TIPIEN :

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu,
- 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Süjak, 10. Aonung,
- 11. Dokan,
- 13. Tinu.



KIBONG KA NUNG MANGATETEP ADOKER :



Kinungtsü : Saaala, ni ya nü den masü Satan ka denang kibong aküm nung tajungba sülasüng.

Kinungbo : Ayaya, ajibo linük ozüngi memelar, kudasür kinunger o kinunger na kibong akümtsüba?

- Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Gaurav-i PM Modi dangi CM Sarma kinungtsü atema shidi zülü



Riniki Bhuyan Sharma (Abelen), MP Gaurav Gogoi (Achiji)

Guwahati, September 26, 2023 (Agencies): Assam Chief Minister Himanta Biswa Sarma kinungtsü Riniki Bhuyan Sarma nem government subsidy agütsüba PM Modi-i tebang aitsüla ta Member of Parliament (MP) aser Lok Sabha nung Congress Deputy Leader Gaurav Gogoi-i tanü metetdaksü. Public tsüngdang tashishitsü malitsü atema Centre sorkari subsidy agütsüba osang jangjatsüla ta Gogoi-i ashi.

Commerce and Industry, Piyush Goyal-i Lok Sabha nung osang sangoktsüba sülen iba onük temai adok ta Congress MP Gogoi-i Prime Minister dangi shidi ka züluba nung shia lir. Centre sorkari Assam nung PMKSY kübok Food Processing Projects yariba indang list ka Piyush Goyal-i metetdaksü. Iba ya Northeastern State tem nung January 21, 2022 tashi nung agütsüba indang liasü. Iba list nung serial no. 7 nung

M/S Pride East Entertainments Private Limited indang tenüng shia lir aser Rs 10 crore (Grand-in-aid) agütsütsü agizük ta Gogoi-isa shidi nung ashi. Ajisüaka Assam chief minister-ibo "Hao BJP politicians kinunger ajaki pei pei company lapoktsü aser sorkar subsidy agitsü temeten lir" ta metetdaksü. Ibalala teyari ya chichiba beneficiaries nem agütsüsüla ta Gaurav Gogoi-i PM Modi dang shidi nung shiogo.

APPSC paper temai adokba atema PAJSC-i mener lungkak aiter

Itanagar, September 26, 2023 (Agencies): Pan Arunachal Joint Steering Committee (PAJSC)-i Itanagar nung aliba tennis court nung ghonda 72 mener lungkak aitba sentong ka tenzükogo. PAJSC-i "Dawn of a Revolution & Decaying System

Destroying the Dreams, Hopes & Aspirations of Generations for Decades" omen nung ajemdaker APPSC paper temai adokba atema takhangba agütsübatem nenshia iba sentong agir. Arunachal Pradesh Public Service Commission (APPSC)

indang question paper temai adokba ken o atema PAJSC-i ola adoka arur. PAJSC-i iba tatalokba jungjunga bushisüngdangtsü aser aibelenertem merenshitsu takhangba agütsür aser iba atema mener lungkak aitba sentong agir.

Mizoram court-i taoba CADC CEM Tongchangya aitsür

Aizawl, September 26, 2023 (Agencies): Mizoram nung okadak kati Chakma autonomous district council (CADC) nung taoba chief executive member (CEM) Kali Kumar Tongchangya aitsüogo. Hombarnü Aizawl district court special judge (prevention of corruption act) - HTC Lalrinchana-i ochimashi ken o ka nung Tongchangya aitsü.



Kali Kumar Tongchangya

Mizoram kübok CADC nung taoba CEM Tongchangya-i Rs 1.79 crore tim mesüi amshi ta osang angazüker. Iba sen ya gari lenmang yanglutsü atema liasü saka party campaign fund aser party expenses nung amshi. Tongchangya ya February 2022 nung apu saka Gauhati high court nung Aizawl bench ajanga Rs 50,000 bail bond nung pa chioka liasü.



September 18 nü Assam Forest Battalion personnel-i Naitong nunger Lokhi Wangsu khasetba anema Khonsa nung nisungtemi lungkak aitba sentong ka agiba noksa nung angur. Lungkak aiteremi Wangsu tepsetba bushisüngdangtsü aser aibelenertem merenshitsu takhangba agütsü. Parnokisa arrtsü ken o mangatetep tashi Towang Reserved Forest nung Assam Forest Guards and Battalion ajanga patrolling mapa meinyaktsü takhangba agütsüogo.



Vancouver, British Columbia nung Indian Consulate kima longkak aitiba mapang longkak aiter kati India Ato Kilonser Narendra Modi indang noksa ka dak sandal agi azükba noksa nung angur. Khalistani kiralongrar Hardeep Singh Nijjar tepsetba nung India densema liasü ta aitsüba sülen India aser Canada na mangatettep adoker lir.

Nagorno-Karabakh nung totzü ayudak ka apok; nisung 20 asü

Stepanakert, Rongjui/ September 26 (Agencies): Nagorno-Karabakh nung totzü ayudak ka apokba sülen nisung 20 asü aser nisung nokklang aika yiruogo, ta Armenia nung local ketdangsürtemi ashi.

Lendong atalokba sülen nisung 300 shi mozükidangi anir ao aser parnok aika temang kanga mejungi lir.

Armenia sorkari Nagorno-Karabakh nungi refugee 13,350 arrtsü adena par linüki aitogo ta ashiba sülen iba lendong atalokogo

Azerbaijan nung iba mangatettep adoker aliba tesem nung Armenia nung 120,000 shi lir.

Hombar nikongtsütsü Khankendi yimti, koba dang Armenia nungeri Stepanakert ta ajar iba yimti anasa totzü ayudak ya kodaser apok iba indang mejangjai lir.

Nüburtem meyirejang aika iba tesem toktsür aotsü merangba mapang Petrol station tem kanga mazüangi lir aser kasa mapang nung Azerbaijan-i ita ka shi tenokdangba agütsüba ajanga Petrol station tem nunga totzü agi kanga anünga arudar.

Mongolbarnü local ketdangsürtemi sangdong ka ajanga ashiba agi, mejangjaba tasü mang 13 lendong atalokba tesem nung ngutetogo aser nisung tenet mozükidang süogo.

Parnokisa, mi agi ronger alir 290 anepalutsü atema doctor tem kanga mazüangi inyaktedar.

Human Rights Ombudsman Gegham Stepanyan social media ajanga ashiba agi, "nüburtem timba mi agi kanga mejungi ronger lir. Nagorno-Karabakh nung parnok anepalutsüsa facility peria mali."

Armenia health ministry-i ashiba agi, iba tesem kübok mozüki balala nung alirtem anintsü asoshi parnoki helicopter tem yokdar. Azerbaijan-ia, parnoki medical supply tem yokogo, ta ashi.

Azerbaijan-i taoba hopta Nagorno-Karabakh atsüngba sülen Yerevan nung Armenia sorkari rara ajanga talidak makai akümertemi anintsü asoshi parnok sentong aliba lemsatep aser iba sülen nüburtem aika iba tesem toktsürogo.

Armenia Ato Kilonser Nikol Pashinyan-i ashiba agi, iba tesem nung kin ka samatsütsü asoshi inyaksangshi tenzükogo.

Ajisüaka Azerbaijan-i ashiba agi, parnoki Armenia nungertem kasa lisopur ama tanaben amenokshidaktsüner.

International Development atema US Agency tekolakba Samantha Power-i, Azerbaijan dang ceasefire maneni benoka inyaksangshitsü aser Nagorno-Karabakh nung civilian tem temeden wazüka toktsütsü atema jenjang tapet agitsü ayongzükogo.

Nagorno-Karabakh aser Armenia na lenmang ka agi dang sendakteper aser iba lenmang nung Armenia

nungertem iba tesem toktsür aotsü merangertem sünga mener gari aser bus tem sendaka lir.

Nagorno-Karabakh ya South Caucasus nung lir. Iba tesem ya alima kintemi Azerbaijan meyong ta agizüker lir, saka küm semer dak tema Armenia nungertemi iba tesem azioka aruogo.

Iba tesem ya Armenia aser Russia napronglai pusema aruogo, kong taoba küm asem tashi Russia indang peacekeeping mission ka amenoka lir.

Taoba hopta Azerbaijan indang army-i iba tesem amak tenzükba sülen Russia nunger sepai pongu den Armenia nunger 200 shi aser Azerbaijan nunger sepaitem aika süogo.

Deobarnü Azerbaijan indang defence ministry-i sangdong ka ajanga rocket, artillery shell, mine aser tanga injangtem densema prangbong hadir aika apuba metetdakja liasü.

Azerbaijan-i nüburtem dang parnok dak kecha mataloktsü ta shiaka Nagorno-Karabakh nung aliba nüburtem kanga tsüputeper, kechiyong telungpurtemi ceasefire agizüka parnok hadirtem bendanga agütsütsü mulunga agizükba sülen chiyongtsü tone 70 dang iba tesemi bener aotsü temelaba agütsüogo.

Armenia nunger lenirtemi ashiba agi, nisung meyirejang aika tachi tajemtsü maka aser basement, school ki mesüra kima mejangdar.

South Korea-i ayongzüka Japan & China den senden menogo

Seoul, Rongjui/September 26 (Agencies): South Korea-i ayongzüka China aser Japan nungi lenir tejentem den senden ka menogo. Seoul aser Tokyo na United States den security dak sendakba nung tesendaktep akangshiba China-i süoki ia bilemba süngjemtsütsü aser linük asem lenirtem senden asendenshitsü nükjidong nung iba senden ya ayongzüka agi ama angateter.

North Korea-i, tenokdangba agütsür aliba missile tem tali tendangba aser Russia amala linük den tesendaktep yanglushitsü merangba mapang ka nung Seoul-i, US aser Japan na den tesendaktep akangshia arudar.

August ita South Korea, Japan aser US nunger Washington, DC nung summit ka ayongzüka agiogo. Linük asem yagi mapangshia military drill tem ayongzüka agia arudar.

Mongolbarnü senden nung South Korea indang Deputy Foreign Minister Chung Byung-won, Japan indang Senior Deputy Foreign Minister Takehiro Funakoshi aser China indang Assistant Foreign Affairs

Minister Nong Rong nunger densema liasü.

Parnok asem ya South Korea Foreign Minister Park Jin dena senden ka menogo, shibai parnok dang linük asem nung aliba nüburtemi ajangshitsüsa tajangzük akaba maparentem benoka inyaksangshitsü atema longjemer inyaktsü ayongzüka liasü.

Chinese foreign ministry otongdar Wang Wenbin-i Hombarnü ashiba agi, linük asem ka kidanger aser kanga tongtambang cooperative partner tem lir aser linük asem tesendaktep akangshiba ajanga ajak ajangzüktsü.

Linük asem ya mezüngbuba 2008 küm senden ka amen, saka 2019 küm COVID-19 wara poktetba aser World War II nung Japan inyakyim dak sendakba nung Tokyo aser Seoul na mangatettep aliba ajanga iba senden magi aruogo.

China ya North Korea asoshi shishilembaba tsütsü partner tongtambangtiba lir.

China-i tawa Pyongyang indang military parade tem nung shilem agitsü atema lenir tejentem yokogo.

Imran Khan ano anogo 14 sota ayutsü



Islamabad, Rongjui/ September 26 (Agencies): Pakistan nung special court kati Mongolbarnü, taoba Ato Kilonser Imran Khan, Cipher ken o nung ano anogo 14 judicial custody nung ayutsü atema obendang agütsüogo aser iba ajanga pa takaraba nung chioaktsü atema timla maka kümdar.

Khan shiba Pakistan Tehreek-e-Insaf (PTI) party tekolakba lir, pa ya Official Secrets Act nung aibelena taoba küm March ita Washington nung amenoker aliba linük embassy-i yokba secret diplomatic cable (cipher) ka lemsatepba atema aija ken o benokba sülen taoba ita apu.

Tang agi tasemben buba arishi küm 70 tain Khan ya tepuokdak ayutsü tetuyuba agütsüogo. Taoba mapang pa anogo 14 sota ayutsü atema tetuyuba agütsüba Mongolbarnü tembangogo.

Special court obendanger Abual Hasnat Zulqernain-i, District Jail Attock nung ken o angadang liasü. Toshakhana ken o nung aija apuba sülen Khan August 5 nü nungi iba tepuokdak yua liasü.

Ken o angadangba sülen okadang ajanga, bushisüngdang tembangtsü atema pa October 10 tashi judicial custody nung ayutsü tetuyuba agüja liasü.

Okadak ajangsa taoba foreign minister Shah Mahmood Qureshi-a anogo 14 judicial custody nung ayutsü tetuyuba agütsüogo. Qureshi-a kasa temzüng ozüng kübok aija lir.

Islamabad High Court-i Hombarnü ketdangsürtem dang Khan Rawalpindi nung Adiala jail-i anir aotsü tetuyuba agütsü, saka tang tashi anir mao lir.

Security dak sendakba nung tebilemstü aliba ajanga tepuokdak ken o angadangtsü atema ketdangsürtem nem temelaba agüja liasü.



Odesa Region Administration-i lemsatepba noksa ka nung Ukraine kübok Izmail tesem Russia nunger indang rocket kati amakba sülen mibenertemi port infrastructure nung mi temseptsü merangba yangi angur.

NSF Trophy: Jahkhama YO aser Teima Khe nati takok angu



Kohima, Rongjui/September 25 (TYO): 23buba NSF Martyrs' Memorial Trophy nung Mongolbarnü Jahkhama Youth Organisation aser Teima Khe Kedima nati pei tata asaya koka tasembuba round-i iogo.

Iba asayamung ya Angami Students' Union (ASU)-i ayongzüka Indira Gandhi Stadium Kohima nung tang tasayadak lir.

Mongolbarnü mezüngbuba asaya Jahkhama Youth Organisation-i goal 4-2 agi Meriema Village Youth Organisation kokogo.

Asaya nung mezüngbuba goal ya Jahkhama atema Avito Khieya-i (15) minute 8buba nung idakja liasü. Iba sülen asaya tanabuba shilem nung

Shürhosül Zhotso (9), Rokovikho Khatso (11) aser Mechievizo Khatso (13) nungeri minute 49, 54 aser 56buba nung goal kaka idakja liasü.

Asaya nung minute 73buba nung Jahkhama nungi asayar Panger Sunep-i (2) own goal ka idaktsü aser iba sülen Meriema atema Khrieneituo-i minute 87buba nung tanabuba goal idakja liasü.

JYO nungi Mezizoto aser MVYO nungi Vizovoto na nem asayar yimya shitak mebenshiba atema yellow card agüja liasü. Asaya atema man of the match naroküm JYO nungi Avito Khieya (15) nem agüja liasü.

Mongolbarnü tanabuba

asaya Teima Khe Kidima-i goal 3-0 agi Chedema Warriors FC kokogo.

Asaya mezüngbuba shilem nung telok anaprongla kanga toktepa asaya saka goal ka danga magütsütet. Ajisüaka asaya tanabuba shilem nung Vizopa Phinyo-i (16) minute 51buba nung mezüngbuba goal idaktsü aser Pupisa Pucho-i (12) minute 58buba nung tanabuba aser Kenopol Thokwe-i (11) minute 61buba nung tasembuba goal idakja liasü. Asaya nung Kenopol Thokwe nem man of the match naroküm agüja liasü.

September 27 nü asaya:

1. KSC Chozuba vs Liangmai FC @ 11:30 AM
2. Viswemi FC vs 12 Tribes FC @ 1:30PM.

Mumbai City FC aser Al Hilal na DY Patil Stadium nung asayatsü

Rongjui/September 26, 2023 (Agencies): AFC Champions League nung Mumbai City FC pur November 6 nü Al Hilal den Navi Mumbai kübok DY Patil Stadium nung asayatsü.

Mumbai City FC pur indang home ground ya Andheri nung Mumbai Football Arena lir, ajisüaka AFC Champions League asayatem ayongzüka asayatsü atema facility peria maliba ajanga ground tanga ka nung asayatsüsa aküm. Ibayongji MCFC pur Balewadi, Pune nung Shree Shiv Chhatrapati Sports Complex-i belener ao.

AFC Champions League nung Mumbai pur mezüngbuba asaya nung Iran club Nassaji Mazandaran-i goal 2-0 agi koka iba asayamung junga metenzüket.

Pune melena Navi Mumbai shimba indang kuli agütsüba mapang club-i ashiba agi, parnok i asaya ya Maharashtra' nung dang asayanüa liasü.

"Temaba jenjang nung asayaba football asayatem ayongzüka asayaba sülen Shree Shiv Chhatrapati Sports

Complex ya Mumbai asoshi anasatiba ground lir aser iba ajanga Mumbai City FC fan tema Mumbai nungi senzusenpongtsü atema tezübaba kümdaktsütsü," ta MCFC-i ashi.

Navi Mumbai nung DY Patil Stadium kong Mumbai City FC pur taoba mapang domestic asayatem asayaogo iba ground ya International Cricket Council (ICC) aser Board of Control for Cricket in India (BCCI)-i taruba 2023 ICC Men's Cricket World Cup atema practice ground ka ama mekazüker liasü

Pune nung Shree Shiv Chhatrapati Sports Complex indang capacity ya 9,000 shi dang lir aser Saudi Arabia indang Al Hilal club amala ka den asayaba mapang fan tem atema iba ground ya ilara asütsü kechiyong Al Hilal nung Brazil nung nungtu asayar Neymar den Ruben Neves, Kalidou Koulibaly aser Sergej Milinkovic-Savic nung amala asayatem densema lir.

DY Patil Stadium, koba multi-purpose stadium ka lir, iba

stadium indang capacity ya 55,000 shi lir kong fan tem timba asemstsü aser facility-a tajungba lir.

Head coach Des Buckingham aser defender Akash Mishra nati fan tem dang ground sünga adenshitsu mepeshia liasü, saka AFC Champions League asayaba mapang stand tem aika tazüng liasü.

India nunger fan tem Mumbai City FC masü saka AL Hilal pusemstsü atema arutsü asü ta asüngdangba mapang Akash Mishra-i, "yamajibo masütsü, kechiyong ni text aika agizükogo kong nüburtemi ni European football repranger, ni asayar balala aika repranger saka tang yabo linük dak sendaka lir anungji Mumbai City FC ang pusemstsü, ta shiogo. Onoki parnok nem onok pusemdaktsüner aser takok tashi stadium-i arudaktsüner. Onoki nisung aika arudaktsüner kechiyong asaya repranger kodang timba südir iba ajanga onok tajungba asayatsü asoshi ajungmesor," ta ashi.

Hasaranga aser Chameera na World Cup masayatetsü

Rongjui/September 26 (Agencies): Sri Lanka nunger tongtibang asayar Wanindu Hasaranga aser Dushmantha Chameera na yirur aliba ajanga mongolbarnü ODI World Cup atema asayatem sangdongba nung züngoksema mali.

Lankan board-i sangdong ka ajanga, India nung asayatsü aliba World Cup nung Sri Lanka team Dasun Shanaka lenisüba nung asayatsü ta ashiba den fast bowler Chameera aser all-rounder Hasaranga na yirur aliba tang tashi taneptsü monguteti lir ta metetdaksü.

Iba asayamung atema Kusal Mendis vice captain asütsü shimogo. Chameera taoba ita Lanka Premier League asayaba mapang pectoral muscle yirua liasü aser kasa mapang nung Hasaranga-a hamstring yiruba ajanga Asia Cup nunga shilem magitet, kong final nung Sri Lanka-i India mekoki liasü.

"Asayar 15 agi kümtetba squad nung Wanindu Hasaranga densema mali, kechiyong pa tang tashi taneptsü mongui lir," ta Sri Lanka Cricket-i metetdaksü. "Pa yirur aliba

maneni asadanga alitsü aser asayatsü asoshi temang anema kümra WC mapang asayar kar danga yirura melentsü asoshi asadangsü."

Hasaranga team nung mezüngoksema ya takoksa tulu asütsü kechiyong arishi küm 26 tain asayar ya taoba T20 World Cup ana nung team nungi wicket timba agiba asayar lir.

Sri Lanka-i team nung leg-spinning all-rounder Dushan Hemantha züngoksemogo aser Karunaratne reserve player ama shimogo.

Sri Lanka team taküm World Cup nung mezüngbuba asaya South Africa den October 7 nü asayatsü.

Sri Lanka squad: Dasun Shanaka (captain), Kusal Mendis, Kusal Perera, Pathum Nissanka, Dimuth Karunaratne, Sadeera Samarawickrama, Charith Asalanka, Dhananjaya de Silva, Dushan Hemantha, Maheesh Theekshana, Dunieth Wellalage, Kasun Rajitha, Matheesha Pathirana, Lahiru Kumara, Dilshan Madushanka

Travelling reserve: Chamika Karunaratne.

Asian Games: Indian equestrian team-i gold angu



Rongjui/September 26, 2023 (Agencies): 19buba Asian Games nung Mongolbarnü Indian equestrian team nung Anush Agarwalla, Hriday Vipul, Divyakriti, aser Sudipti Hajela nungeri ötsüsüsüsa gold medal ka nguogo.

Team Dressage event nung parnok ajak senteper point 209.205 ngua gold medal angu.

Asian Games nung iba asaya nung tang mezüngbuba India nunger team kati gold medal nguogo aser equestrian tetoktepa nung küm 41 sülen tang mezüngbuba gold medal ka nguogo.

Asia kübok linük balala nungi sempet aketba asayatem aika adenshia ghonda 10 shi asayaba sülen India nunger asayar Agarwalla, Chheda, Divyakriti, aser Hajela nungeri tongtibang mapangtem nung kanga junga asaya takok tajung ngutetogo.

Anush Agarwalla aser pa

indang kor (horse) ETRO nati point 71.088 angu koba ajak dang timtiba liasü. Kasa mapang nung Hriday Chheda aser kor Emerald nati point 69.941; Divyakriti Singh aser kor Adrenalin Firdod nati point 68.176 aser Sudipti Hajela aser kor Chinski nati point 66.706 ngua liasü.

India nunger asayatem ajak senteper iba tetoktepa nung point 209.205 ngua parnoki tanabuba jenjang nung tembangba China team (204.882) ajateta liasü. Anush Agarwalla-i kanga junga asaya point 71.088 anguba den Hriday aser Divyakriti natia kanga junga point ngutetba sülen tanga team tem ka danga parnok anasa maliasü.

India team-i iba asaya akoktsü imlaba China aser Japan team amala ajateta Team Dressage event nung takok tajung ngutetogo.

BILEMDANGANG

"Anema ali nung dang tebilemba ajak tongtettsü."